

## **Incumbensa Florin-Caluori concernent il scleriment da la cumpetenzza per pajar ils custs da la gestiun da mandats resp. las indemniziuns a favur da las curatellas professionalas en il chantun Grischun**

I n'è betg cler, tge vischnanca ch'è responsabla per pajar ils custs d'indemniziun dals procuraturs professionalas. Oz vegnan quints che las curatellas professionalas tschantan per lur lavur, tramess vi e nà d'ina vischnanca a l'autra. Quai sto vegnir sclerì. La finamira è quella ch'i vegnia designada la vischnanca ch'è responsabla per surpigliar ils custs.

Plinavant vegni pretendì ch'ils custs vegnian repartids tranter las vischnancas tenor la durada da l'obligaziun da sustegn (scleriment dals puncts da contact).

La procuratura u il procuratur ha il dretg d'ina indemniziun commensurada e d'ina cumpensaziun da las spesas. L'autorità per la protecziun da creschids fixescha l'autozza da l'indemniziun en ina disposiziun.

Sche quests custs da la gestiun da mandats na pon betg vegnir pajads ord la facultad da la persuna pertutgada u betg vegnir adossads a terzas personas, ston els – tenor l'art. 63a al. 2 LItCCS – vegnir surpigliads da quella communitad ch'è cumpetenta per il sustegn tenor il dretg public. Tenor l'art. 5 da la lescha chantunala da sustegn (DG 546.250) è quai quella vischnanca politica, en la quala la persuna basegnusa ha ses domicil.

Sch'ina persuna basegnusa sut curatella mida dentant ses domicil entaifer il chantun Grischun, sa tschenta en la pratica la dumonda betg sclerida, sche la nova vischnanca da domicil sto surpigliar er quels custs da la gestiun da mandats ch'èn resultads avant la midada da domicil. Plinavant n'èsi er betg cler, tge mument ch'è decisiv per fixar la basegnusadad e sch'ils custs da la gestiun da mandats pon vegnir adossads a la persuna sut curatella er, sche quai tanghescha l'import da facultad liber da taglia tenor il dretg d'agid social.

Tras la complettaziun da l'art. 29 da l'ordinaziun davart la protecziun d'uffants e da creschids (OPUC; DG 215.010) èsi pussaivel da schliar las dumondas dispitaivlas ed uschia da stgaffir la segirezza giuridica urgentamain necessaria.

### **Las sutsegnadras ed ils sutsegnaders incumbenseschan la regenza da complettar l'art. 29 OPUC:**

L'art. 29 OPUC duai vegnir complettà cun in alinea 4 che ha la suandanta formulaziun:

*<sup>4</sup> Ils custs che ston vegnir surpigliads da la communitad tenor l'artitgel 63a LItCCS, vegnan repartids sin las vischnancas politicas tenor la durada da lur obligaziun da sustegn. Obligada da pajar prestaziuns preliminaras è la communitad che ha in'obligaziun da sustegn il mument che l'autorità per la protecziun d'uffants e da creschids prenda la decisium.*

L'art. 29 OPUC duai vegnir complettà cun in alinea 5 che ha la suandanta formulaziun:

*<sup>5</sup> Tut ils custs ston vegnir surpigliads da la communitad responsabla, sche la facultad da la persuna pertutgada è pli bassa che l'import da facultad liber da taglia tenor il dretg d'agid social, resguardond la grevezza da l'indemniziun e las spesas a la fin da la perioda da rapport ch'è vegnida controllada da l'autorità per la protecziun d'uffants e da creschids.*

Cuira, ils 12 da favrer 2019

**Florin-Caluori**, Natter, Degiacomi, Atanes, Baselgia-Brunner, Berther, Bondolfi, Brandenburger, Brunold, Cahenzli-Philipp, Caluori, Cantieni, Cavegn, Cramer, Della Cà, Deplazes (Cuira), Deplazes (Rabius), Derungs, Epp, Fasani, Flüttsch, Gasser, Grass, Gugelmann, Hartmann-Conrad, Hitz-Rusch, Hofmann, Horrer, Kasper, Kohler, Kunfermann, Locher Benguerel, Loepfe, Maissen, Märchy-Caduff, Michael (Donat), Müller (Favugn), Noi-Togni, Paterlini, Preisig, Ruckstuhl, Rüegg, Rutishauser, Sax, Schmid, Thomann-Frank, Thöny, Tomaschett (Breil), von Ballmoos, Weidmann, Wieland, Wilhelm, Buchli (Tenna), Holliger